



Na osnovu članova 131. i 142. Zakona o privrednim društvima ("Službene novine Federacije Bosne i Hercegovine", broj: 23/99, 45/00, 2/02, 6/02, 29/03, 68/05, 91/07, 84/08, 7/09, 63/10 i 75/13) i člana 57. tačka 1. Statuta Javnog preduzeća Elektroprivreda Bosne i Hercegovine d.d. – Sarajevo, prečišćeni tekst, broj: SD-1067/11 -19/3.b) od 09.03.2011. godine, Statuta o izmjenama i dopunama Statuta Javnog preduzeća Elektroprivreda Bosne i Hercegovine d.d. - Sarajevo, broj: SD-28363/11-23/2 od 24.11.2011. godine i Statuta o dopunama Statuta broj: SD-7863/12-25/2. od 20.04.2012. godine i člana 5. Odluke o preuzimanju udjela Federacije Bosne i Hercegovine u privrednim društvima - rudnicima uglja u Federaciji Bosne i Hercegovine, broj: SD-12-9330-3./09 od 12.05.2009. godine, Skupština Javnog preduzeća Elektroprivreda Bosne i Hercegovine d.d. - Sarajevo, na Trideset i prvoj sjednici, dana 29.05.2014. godine, donijela je

**ODLUKU**  
**o povećanju osnovnog kapitala emisijom dionica**

**Član 1.**  
**(Iznos povećanja osnovnog kapitala)**

Ovom Odlukom se osnovni kapital Javnog preduzeća Elektroprivreda Bosne i Hercegovine d.d. - Sarajevo, ul. Vilsonovo šetalište br. 15., Sarajevo (u daljem tekstu: Društvo ili Emitent ) u iznosu od 2.155.160.199,00 KM, upisan u nadležnom registru društava i kod Registra vrijednosnih papira Federacije Bosne i Hercegovine, povećava za iznos od **81.804.212,00 KM** (slovima: osamdesetjedanmiliosamstotinačetirihiljadvijestotinedvanaest i 00/100 KM).

Osnovni kapital Društva će nakon emisije dionica dioničarima Društva iznositi 2.236.964.411,00 KM.

**Član 2.**  
**(Klasa, broj i nominalna vrijednost dionica)**

Povećanje osnovnog (upisanog) kapitala u iznosu utvrđenom u članu 1. stav 1. ove Odluke vrši se emisijom redovnih (običnih) dionica, postojeće klase.

Emituje se 1.152.172 redovnih (običnih) dionica, postojeće klase, nominalne vrijednosti 71,00 KM po jednoj dionici.

Emisija iz stava 1. ovog člana će se vršiti zatvorenim ponudom, u kojoj se poziv za upis i uplatu dionica upućuje unaprijed poznatom kupcu Federaciji Bosne i Hercegovine, odnosno Federalnom ministarstvu energije, rudarstva i industrije kao organu Federacije BiH koji vrši ovlaštenja u Javnom preduzeću Elektroprivreda BiH d.d. – Sarajevo po osnovu učešća državnog kapitala i koji je u Registru vrijednosnih papira u Federaciji BiH evidentiran kao dioničar Javnog preduzeća Elektroprivreda BiH d.d. – Sarajevo pod nazivom: „Federalno ministarstvo energije, rudarstva i industrije (drž.vl.)“.

**Član 3.**  
**(Prava sadržana u dionici)**

Svaka dionica iz ove emisije daje ista prava kao i sve ranije izdate redovne (obične) dionice Emitenta, i to upravljačka i imovinska prava koja dioničari ostvaruju u skladu s zakonom i Statutom Emitenta.

#### Član 4.

##### (Opis, način procjene i procijenjena vrijednost prava kojima se plaćaju dionice)

Dionice iz ove emisije poznati kupac Federacija Bosne i Hercegovine, odnosno Federalno ministarstvo energije, rudarstva i industrije će platiti prenosom prava – udjela Federacije Bosne i Hercegovine na JP Elektroprivreda BiH d.d. - Sarajevo u slijedećim rudnicima:

- Rudnik mrkog uglja "Kakanj" d.o.o. Kakanj
- Rudnik mrkog uglja "Breza" d.o.o. Breza
- Rudnik "Gračanica" d.o.o. Gornji Vakuf - Uskoplje
- Rudnik mrkog uglja "Abid Lolić" d.o.o. Travnik - Bila
- Rudnici "Kreka" u Tuzli, d.o.o.
- Rudnik mrkog uglja "Đurđevik" d.o.o. u Đurđeviku
- Rudnik mrkog uglja "Zenica" d.o.o. Zenica

Procjena vrijednosti prava utvrđena je u „Izveštaju o procjeni vrijednosti udjela Federacije BiH u sedam rudnika uglja, na dan 31.decembar 2008.godine“ od 16.10.2009.godine, koji je, u skladu sa Međunarodnim Standardima Procjene (MSP) izradio „PricewaterhouseCoopers“.

U postupku procjene tržišne vrijednosti 100% kapitala rudnika uglja primijenjena su dva osnovna pristupa/metode procjene i to **Prinosni pristup** (metod diskontovanih novčanih tokova - metoda DNT) i **Tržišni pristup** (metod uporedivih kompanija i metod uporedivih transakcija) pri čemu je DNT metoda primijenjena kao osnovna metoda u procjeni, dok su tržišni metodi imali pomoćnu ulogu uslijed niza ograničenja za njihovu primjenu u konkretnom slučaju.

Nezavisni procjenitelj je procijenio vrijednost prava kojim je predviđeno plaćanje dionica ove zatvorene emisije u iznosu od 81.804.238,00 KM.

Razliku između procjenjene vrijednosti udjela u sedam rudnika uglja (81.804.238,00 KM) i ukupnog iznosa povećanja osnovnog kapitala iz člana 1. ove Odluke (81.804.212,00 KM) u iznosu od 26,00 KM, nastalu zbog potrebe zaokruživanja broja dionica, JP Elektroprivreda BiH d.d. – Sarajevo će evidentirati u korist fonda rezervi.

#### Član 5.

##### (Naziv banke depozitara, mjesto i rok upisa i uplate dionica)

Upis i uplata dionica će se vršiti kod Banke depozitara: Intesa Sanpaolo Banka d.d. ulica Obala Kulina bana 9a, Sarajevo.

Upis i uplata dionica će se vršiti u periodu od **08.09.2014.** do **15.09.2014.** godine.

Dionice iz ove emisije će se upisati i uplatiti kod Banke depozitara - Intesa Sanpaolo Banka d.d. ulica Obala Kulina bana 9a, Sarajevo, predajom relevantne dokumentacije od strane poznatog kupca - Federalnog ministarstva energije, rudarstva i industrije.

#### Član 6.

##### (Granica uspješnosti)

Donja granica uspješnosti upisa je 100% od ukupnog iznosa broja dionica iz člana 2. ove Odluke.

Prodaja će se smatrati neuspješnom kada do utvrđenog roka za upis i uplatu dionica nije postignuta visina od ukupne vrijednosti utvrđene emisijom. Emitent ima pravo na prekid upisa i uplate dionica prije isteka utvrđenog roka, kada je:

- a) ukupan broj emitovanih dionica upisan prije roka i
- b) donio posebnu Odluku o prekidu upisa i uplate dionica u skladu s zakonom.

#### **Član 7.**

##### **(Pravo preče kupnje, način, mjesto i rok upisa dionica po osnovu prava preče kupnje)**

Prilikom ove emisije postojeći/ostali dioničari koji su na dan donošenja ove Odluke evidentirani na listi dioničara kod Registra vrijednosnih papira u Federaciji Bosne i Hercegovine imaju pravo preče kupnje, u obimu kojim zadržavaju učešće u osnovnom kapitalu koje su imali prije ove emisije.

Ukoliko se kod izračunavanja pripadajućeg broja dionica po osnovu prava preče kupovine ne dobije cijeli broj, vrši se zaokruživanje na manji cijeli broj, ako je ostatak manji od 50% jedne dionice, odnosno na viši cijeli broj ako je ostatak jednak ili veći od 50% jedne dionice.

Uplata novih dionica po osnovu prava preče kupnje se vrši u novcu, po nominalnoj vrijednosti 71,00 KM po dionici.

U roku od 10 dana od dana donošenja ove Odluke, postojećim/ostalim dioničarima će se uputiti obavijest o dionicama koje se nude, obimu prava preče kupnje, mjestu, vremenu i načinu ostvarivanja tog prava.

Dioničari koji namjeravaju koristiti pravo preče kupnje dužni su se o tome pismeno izjasniti u roku od 14 dana od dana prijema obavijesti, a u slučaju da se dioničar ne izjasni u navedenom roku smatrat će se da je ponuda odbijena.

Pod danom prijema obavijesti iz ovog člana se smatra dan objave obavijesti u dnevnim listovima: Oslobođenje i Dnevni avaz, na web stranici Sarajevske berze – burze vrijednosnih papira i na web stranici Emitenta.

Dioničari koji se u roku iz stava 5. ovog člana izjasne da namjeravaju koristiti pravo preče kupnje upis i uplatu dionica po osnovu prava preče kupnje će izvršiti kod Banke depozitara, na po jednom uplatnom mjestu u Sarajevu, Tuzli, Mostaru, Zenici i Banja Luci, u roku iz člana 5. ove Odluke.

U slučaju neuspješne emisije dionica, ostalim dioničarima će se izvršiti povrat uplata u roku od 10 dana od proglašenja emisije neuspješnom. Povrat uplata će se izvršiti na uplatnim mjestima iz prethodnog stava.

#### **Član 8.**

##### **(Utvrdjivanje iznosa upisanog iznad iznosa povećanja osnovnog kapitala)**

Ovlašćuje se Nadzorni odbor da po potrebi donese odluku kojom će utvrditi iznos upisan iznad iznosa povećanja osnovnog kapitala iz člana 1. ove Odluke.

**Član 9.**  
**(Prelazne i završne odredbe)**

Nadzorni odbor i Uprava Emitenta se obavezuju da provedu sve neophodne aktivnosti iz njihove nadležnosti kako bi se povećanje osnovnog kapitala emisijom dionica zatvorenim ponudom izvršilo na zakonom propisani način.

Ovlašćuje se Nadzorni odbor Emitenta da može vršiti korekcije ove Odluke u skladu s eventualnim zahtjevima za korekcije od strane Komisije za vrijednosne papire F BiH, Registra vrijednosnih papira F BiH ili Registra poslovnih subjekata, kao i da donese sve druge odluke i akte neophodne za uspješno povećanje osnovnog kapitala emisijom dionica u skladu sa zakonom.

**Član 10.**  
**(Stupanje na snagu)**

Odluka stupa na snagu danom donošenja.

Broj: SD-12083/14 - 31/3.1.  
Sarajevo, 29.05.2014. godine

Predsjednik  
Skupštine Društva

Jasmina Pašić

